

প্রথমবার অ্যাঙ্কলজি সিরিজে মোশাররফ করিম

প্রতিদিনই ওটিটি প্ল্যাটফর্মে মুক্তি পাচ্ছে নতুন নতুন কনটেন্ট। নভেম্বর মাসে মুক্তি পাওয়া ওটিটি কনটেন্ট সহ চলতি মাসে মুক্তির অপেক্ষায় থাকা নতুন ওয়েব সিরিজ, সিনেমা, প্রামাণ্যচিত্র ও রিয়েলিটি-শো এর খবর জানাচ্ছেন সীমান্ত।



আধুনিক বাংলা হোটেল - চরকি

গত ৭ নভেম্বর ওটিটি প্ল্যাটফর্ম 'চরকি' তে মুক্তি পায় কাজী আসাদ পরিচালিত মিথলজিকাল, ফ্যান্টাসি ও থ্রিলার ঘরনার 'আধুনিক বাংলা হোটেল' সিরিজ। বর্ণাঢ্য ক্যারিয়ারে প্রথমবারের মতো অ্যাঙ্কলজি সিরিজে অভিনয় করেছেন জনপ্রিয় অভিনেতা মোশাররফ করিম। সিরিজটি মূলত 'খাসির পায়্যা' নামক ছোট গল্প অবলম্বনে নির্মিত হয়েছে। 'নো এক্সিট' গল্প থেকে নির্মাণ করা হয় 'হাঁসের সালুন' আর 'বোয়াল মাছের ঝোল' পর্বটি নির্মিত হয় 'খাবার' নামের ছোট গল্প থেকে। তিন পর্বের সিরিজটিতে বিভিন্ন চরিত্রে অভিনয় করেন কাজী রাকায়েত, সালাহউদ্দিন লাভলু, শিল্পী সরকার অপু, একে আজাদ সেতু, নিদ্রা নেহাসহ আরও অনেকে।

মেসমেট - বঙ্গ বিডি

আফজাল হোসেনকে আবারও ওয়েব সিরিজে দেখা গেল। ১৩ নভেম্বর ওটিটি প্ল্যাটফর্ম 'বঙ্গ'তে মুক্তি পেয়েছে তার নতুন সিরিজ 'মেসমেট'। এতে মনোবিজ্ঞানীর চরিত্রে অভিনয় করেছে তিনি। পলাশ পুরকায়স্থর 'মেসমেট' উপন্যাস অবলম্বনে একই নামে সিরিজটি বানিয়েছেন জন মিল্টন। উপন্যাস থেকে পর্দায় গল্প ফুটিয়ে তুলতে চিত্রনাট্যের কিছুটা পরিবর্তন করেছেন নির্মাতা তবে মূল গল্প ও চরিত্রের প্যাটার্ন একই আছে। মামুন নামে এক ব্যক্তি স্বপ্নে সে মানুষের মৃত্যু দেখে। ভয়ানক বিষয় হলো, যেভাবে সে স্বপ্ন দেখে, সেভাবেই মানুষটি মারা যায়। পরামর্শ নিতে মামুন শরণাপন্ন হয় এক মনোবিজ্ঞানীর। একসময় নিজেই নিখোঁজ হয় মনোবিজ্ঞানী। তাকে খুঁজতে গিয়ে গোয়েন্দা বিভাগ পড়ে অথই সাগরে। এমন এক গল্পে নির্মিত হয়েছে সিরিজটি। সিরিজে গোয়েন্দা কর্মকর্তার চরিত্রে অভিনয় করেছেন মোস্তাফিজ নূর ইমরান।



ফ্রেঞ্জি - বিজ্ঞ

এই সময়ের বন্ধুত্বের গল্পে 'ফ্রেঞ্জি' নামের এক ওয়েব সিরিজ নির্মাণ করেছেন তরুণ নির্মাতা জাহিদ প্রীতম। এক ঝাঁক তরুণ অভিনয়শিল্পীকে নিয়ে নির্মিত এ সিরিজ দেখা যাচ্ছে ওটিটি প্ল্যাটফর্ম বিজ্ঞ এ। সিরিজটি নির্মিত হয়েছে হাসিব চৌধুরীর 'ফ্র্যাট ১৪৩' গল্প অবলম্বনে। অভিনয় করেছেন আবু হুরায়রা তানভীর, পার্থ শেখ, আইশা খান, সাবরিন আজাদ। ফ্রেঞ্জি গল্পটা এখনকার বন্ধুত্বের গল্প। ফ্রেঞ্জি মানে উন্মাদনা, পাগলামো। বন্ধুত্বের পাশাপাশি এই গল্পে দেখা মিলবে নতুন কিছু চরিত্রের। এই সিরিজটিতে সুখ-দুঃখের অবস্থানের পাশাপাশি আছে রোমান্টিক সম্পর্ক, রেড ফ্ল্যাগ, শেয়ারিং-কেয়ারিং ও ফ্রেডশিপ। ৬ পর্বের ওয়েব সিরিজটি ২০ নভেম্বর মুক্তি পায়।





ভেট্টাইয়ান - অ্যামাজন প্রাইম ভিডিও

ভারতের দক্ষিণী সিনেমার অভ্যর্থনা হিরো রজনীকান্তের ১৭০তম সিনেমা 'ভেট্টাইয়ান' ১০ অক্টোবর মুক্তি পায়। অ্যাকশন ড্রামা ঘরনার সিনেমাটি মুক্তির পর থেকে রেকর্ডের পর রেকর্ড ব্রেক করে। প্রেক্ষাগৃহে ব্যাপক সফলতার পর ৮ নভেম্বর টি জে গ্লানডেল নির্মিত সিনেমাটি ওটিটি প্লাটফর্ম অ্যামাজন প্রাইম ভিডিও তে মুক্তি পায়। গল্পে একজন সিনিয়র পুলিশ অফিসার, যিনি একজন শিক্ষকের হত্যার তদন্ত করার সময় এনকাউন্টারে সময় ঘটনাক্রমে একজন নিরপরাধ ব্যক্তিকে গুলি করেন। যার কারণে তার জীবনে নেমে আসে বিপদ, এই বিপদ থেকে কিভাবে পুলিশ অফিসার মুক্তি পায় তা জানা যায় সিনেমা জুড়ে। ২ ঘণ্টা ৪৫ মিনিট দৈর্ঘ্যের সিনেমাটিতে গুরুত্বপূর্ণ চরিত্রে অভিনয় করেন অমিতাভ বচ্চন, রজনী কান্ত, রিতিকা সিং, ফাহাদ ফাসিলসহ আরও অনেকে।



দেবরা - নেটফ্লিক্স

প্রেক্ষাগৃহে ব্যাপক সফলতার পর ৮ নভেম্বর ওটিটি প্লাটফর্ম নেটফ্লিক্স এ মুক্তি পায় কোরাতলা শিভা রচিত ও পরিচালিত তেলেগু অ্যাকশন ড্রামা ঘরনার 'দেবরা' সিনেমা। সিনেমাটি একটি উপকূলীয় গ্রামের প্রধান দেবরা রাওকে নিয়ে। দেবরা গ্রাম প্রধান হওয়ার কারণে অস্ত্র চোরাচালানকারী দলের প্রধান ভাইরা'র সঙ্গে বিরোধ সৃষ্টি হয়। যা পরবর্তীতে এক রক্তক্ষয়ী যুদ্ধে পরিণত হয়। দেবরা কী পারবে তার গ্রামকে ভাইরা থেকে রক্ষা করতে, তা জানতে হলে দেখতে হবে সিনেমাটি। সিনেমাটিতে অভিনয় করেন সাইফ আলি খান, জাহ্নবী কাপুর, প্রকাশ রাজ, শ্রীকান্ত, শাইন টম চাকোর। ২ ঘণ্টা ৪৫ মিনিট দৈর্ঘ্যের সিনেমাটি মুক্তির আগে বেশ সাড়া ফেলেছিল।



দ্য বাকিংহাম মার্ডারস - নেটফ্লিক্স

বহুদিন পর একক প্রধান ভূমিকায় পর্দায় ফেরা কারিনা কাপুর তার অভিনীত 'দ্য বাকিংহাম মার্ডারস' প্রেক্ষাগৃহে দর্শকদের মন জয় করে এবার ওটিটির পর্দায় এসেছে। ৯ নভেম্বর হানসাল মেহেতা পরিচালিত সিনেমাটি ওটিটি প্লাটফর্ম নেটফ্লিক্স এ মুক্তি পায়। গল্পে কারিনার চরিত্রের নাম জসমিত ভামরা। একাধারে তিনি একজন মা আবার একজন গোয়েন্দা। বাকিংহামশায়ারে এক মৃত্যুর রহস্য তদন্ত করতে যান তিনি। সন্তান হারানোর পর কীভাবে করিনা সত্য সন্ধানে পুলিশের সঙ্গে কাজ শুরু করেন তা তুলে ধরা হয় সিনেমাটিতে। এতে বিভিন্ন চরিত্রে অভিনয় করেন রণবীর ব্রার, অ্যাশ ট্যান্ডন, রুঙ্কু নাহার, প্রবলীন সানু, কপিল রেদেকর, কিথ অ্যালেন, মনীশ গান্ধী।



কালরাত্রি - হইচই

৬ ডিসেম্বর ওটিটি প্লাটফর্ম হইচই তে মুক্তি পাচ্ছে অয়ন চক্রবর্তীর পরিচালিত মেলোড্রামা 'কালরাত্রি'। দীর্ঘদিন পর পরিচালনায় ফিরছেন অয়ন চক্রবর্তী। গল্পে 'দেবী' অর্থাৎ সৌমিত্রয়ার বিয়ের দিন, তার ঘনিষ্ঠ বন্ধু মায়া একটি অশুভ ভবিষ্যত বাণী করে। প্রথমে দেবী তার ভবিষ্যত বাণীকে গুরুত্ব না দিলেও ক্রমাগত তা সত্যি হয় এবং তার জীবনে নেমে আসে অশান্তি। দেবী কী পারবে এই জাল থেকে মুক্তি পেতে? জানতে হলে দেখতে হবে মেলোড্রামাটি। এতে বিভিন্ন চরিত্রে অভিনয় করেন সৌমিত্রীষা ইন্দ্রাশীশ রায়, রাজদীপ গুপ্ত, রূপাঞ্জনা মিত্র, সাইরিটি ব্যানার্জী, অনুজয় চট্টোপাধ্যায়।